



Wumolene Gigkakle



Twu kiruka mturunenu
muchinanu wtokanu
gikshikikowaka

Wumolene Gigkale

Two kiruka mturunenu muchinanu wtokanu gikshikowaka

Dirección Regional de Educación - Ucayali

Av. Sáenz Peña 220, Pucallpa, Ucayali - Perú.

Teléfono: 061-571433 / Telefax: 061-572236

Fondo de las Naciones Unidas para la Infancia - UNICEF

Parque Melitón Porras 350, Miraflores, Lima - Perú.

Teléfono: 613-0707 / Fax: 447-0370

Kamrutakalu "Wumolene Gigkale" wa Kamruewaklerune Ptogi wa Kiruka ga wa Pimrikaka Yimaklewatikalurupa Rixyawaka Yimaklewu Gepi Tokanchiya, EIB chigkaluru; wannani:

Adela Brañez Zumaeta
Adilia Zapata Cesario
Alberto Coquinchi Laureano
Alejandro Smith Bisso
Alfonso Urquía Sebastián
Alfredo Díaz Mozombite
Daniel Urquía Sebastián
Delia Eni Torres Zumaeta
Eloy Pablino Lizardo
Gerardo Díaz Sebastián

Inés Cushichinari Ponciano
Jacob Díaz Etene
Julio Torres Cahuaza
Manuel Sebastián Manchinari
Oscar Saavedra Soria
Rosa Mercedes Ampichi Federico
Segundo Balvino Torres Cahuaza
Segundo Francisco Saavedra Payahua
Teresa Sebastián Sandoval

Rupxaklewanatna:

Anita Sebastián Canayo
Cecilio Díaz Mozombite
Darío Torres Cahuaza
Dorca Nachinari Etene
Jeremías Lizardo Canayo
Jesús Junco Urquía
Magdalis Caviedes Díaz
Nodier Díaz Sebastián
Rittma Urquía Sebastián
Rosa Alvina Noble Macedo
Víctor Ramón Saldaña Ruiz
Wagner Urquía Sebastián

Nikatagetjeretatkalona:

Gerardo Díaz Sebastián
Alejandro Smith Bisso
Segundo Balvino Torres Cahuaza

Yagluchine kamrutachrini:

Noé Silva Morales
Rafael Seminario
Miguel Smith Gonzáles

Giglepokotachrine:

José Guzmán - Video Futura.
Eduardo Chávez Guerra - Video Futura

Hecho el Depósito Legal en la Biblioteca Nacional del Perú No 2011-05457

Primera edición

Lima, Perú, abril de 2011

Tiraje: 84

Impreso en Tarea Asociación Gráfica Educativa, Pasaje María Auxiliadora 156-164, Breña. Teléfono: 3323229

Este material fue elaborado en el marco del Proyecto EIBAMAZ con apoyo del Gobierno de Finlandia.

Wumolene Gigkakle

Twu kiruka mturunenu muchinanu
wtokanu gikshikowaka

Con el apoyo financiero del Gobierno de Canadá, a través
de la Agencia Canadiense para el Desarrollo Internacional (ACDI)



Agence canadienne de
développement international

Canadian International
Development Agency



unicef 
únete por la niñez



Bolivia - Ecuador - Perú
eibamaz
Educación Intercultural Bilingüe
UNICEF - Finlandia



AIDSESP - ORAU



UNMSN-FLCH-CILA



INSTITUTO SUPERIOR PEDAGÓGICO PÚBLICO

BILINGÜE DE YARINACOCHA



Tyinuwakle

Muchinanu tokanchi gikshikiwaka “wumolene gigkakle” walanwa sato kiruka steno kamrutkaluro, gapatjetkaluro satkaka gimatikolu yine pokchi chinanu. Waneylo sat-pacha patsrujire payokgipre tokanchi, gimretachro, wale chinanu tkamrutka twu steno rixpoko tyawaka yineru nshinikanu, ga wa pnumnu gixachri yopgolu giweklu ymananuko yine pokchi. Wa tye tokanchi gapaterutkalurni, pejnuruko gishiklewlu psoluyako tye gogne gwachri galukalurpotu wtokanu gimatkaluru, ga wa mturune, mturone gimatanru.

Romkagimta twu steno yine gixpoko giwkletyawaka tixa. Gixoylo shinikanchi mturune yine gixa giwkletyawaka, waneru shinikanchi satu mumatkotu, mturune gimatanrupa rumatjemyapluna tokanchi. Satkaka tokanchi wa twu kiruka steno gwachri wtokanu wkoshpakinrini wanepotuko tixyapoa twu kiruka. Wane wixa ginglepoklenanumtanru wtokanu wyonre, wuynumsale, wale chinanu tushpaka twu kiruka steno, jiglokachine mturune ga wa mturone gajerya yinuwaka ginumsaletachinewa.

Gimatkalchi kamrutkaluru:

- Pajnakokpotutanu pchinikolu.
- Rumatjemyaplo kirukamta: Yopgolugu ginshinikanu kospakanu gigkalu yonatkaluru gimatkalchi mturune gimatanrutka.
- Kamrutyaplo kirukamta: Yonatkaluru shinikanchi.
- Rutakmoleta wannixle ga wa mawanrixle.
- Psoluko kamrutkaluru wumatanru walukanru muchikawa giknogachri satkaka yineru giwekle.
- Rumatlu ga wa ralixkotlu psoluko gipchekachri giwekachri gawyawaka gajeru rumkata kamruretyapa yineru.

Yineru tokanu jempotupiranatka:

- a) Yimaklewatachriymananuko puyganru yinuwayawaka tokanchi.
- b) Puyganru wale tokanchi twu kiruka towu.
- c) Pukshiniplu waneklu puynumsapotutanru pochkerpotukyi.
- d) Potowgima giynumsaletna.
- e) Pyimakjeru gipxeklewle wa pyonatanrutka pirana. Wane pnute pugkakletanru pupxaluneyma.
- f) Pyonatanru pa pirana muchinanu wkamrutanru pixkalutu.

Wumolene Gigkakle Waneya:

Ch

Chalu	pg. 14
Chawo.	14
Chiklu	15
Chikru-chikru	15
Chino	16
Chipatleru	16
Chiretu.	17
Chkotu.	17
Chokoru	18
Chotu	18
Chowretete	19
Chpichpi	19

G

Gachijri	pg. 22
Gapijru.	22
Gashgaji.	23
Geklo	23
Getlo.	24
Getu	24
Gipetu	25
Giyalu	25
Giyeka.	26
Goma	26
Gopshi	27
Goshiyolu	27

J

Jema.	pg. 30
Jiji.	30
Jimeka.	31

Jinri	31
Jipalu	32
Jito	32
Jiweje	33
Jixolu	33
Jixri	34
Jixriji	34
Jpiro	35
Jwepi	35

K

Kakwalu	pg. 38
Kamaleji	38
Kaskiru	39
Kayatu	39
Kgichimajruto	40
Kina	40
Kokopi	41
Kolpeto	41
Koyano	42
Kshimuna	42
Kshiyojru	43
Kshoteru	43

M

Managi	pg. 46
Mano	46
Manxi	47
Mapchiri.	47
Mchira	48
Mgenoklu	48
Mkachri	49
Mosjiwu	49

Moslo	50
Mrixì	50
Myamtujwe	51

N

Nala	54
Nashchi.	54
Natga	55
Niikaluru	55
Nikapi	56
Nikchi	56
Nso	57
Ntoje	57

P

Pawo.	60
Pejri	60
Peslu	61
Pipxo	61
Plejnako	62
Polero	62
Ponro	63
Protapi	63
Ptsetsru	64
Puseri.	64
Puyo	65
Pwachri.	65

R

Rapchakgale.	68
Rapga.	68
Rapogle	69

Raserowna.	69
Rashiche.	70
Rawrata	70
Ringi	71
Rukamlaka.	71
Rukonre	72
Ruma	72
Rutlogle	73
Rutslolokle	73

S

Sana	76
Santira.	76
Saweto	77
Saxripi	77
Sensewlo	78
Slopa.	78
Soklo	79
Soloji	79
Sroshchi	80
Sunu	80
Supru.	81
Suwa	81

Sh

Shawashka	84
Shepchigeru	84
Sheyna.	85
Shichichi.	85
Shikene	86
Shimagapi.	86
Shimager	87
Shino	87

Shinti	88
Shishri	88
Shweylu	89
Shyo	89

T

Taki	92
Taklala	92
Talutalu	93
Tampora	93
Taya	94
Tlagwa	94
Tochkegi	95
Tolojru	95
Tomotomo	96
Totumta	96
Tetre	97
Tuwumta	97

Ts

Tsakjeru	100
Tsapa	100
Tsapi	101
Tseklu	101
Tsetse	102
Tspata	102
Tsojri	103
Tsolya	103
Tsomipi	104
Tsunruji	104
Tsuwu	105
Tsyii	105

W

Wajeya	108
Wakawa	108
Walo	109
Wamu	109
Wasluji	110
Wapgu	110
Wapra	111
Wata	111
Wawlo	112
Waylama	112
Wgero	113
Wrolo	113

X

Xirikapi	116
Xirna	116
Xripi	117


Y

Yatalu	120
Yawo	120
Yawuro	121
Ylopo	121
Yoko	122
Yonalu	122
Yonipro	123
Yonwaloji	123
Yopixri	124
Yopo	124
Yopri	125
Yotlotlu	125





Ch



Chalu

Yineru kamrutanruni chalu naylotsayma ga wa plomoji rutakasputsatka, rumkata shimane sajikletinripa. Gepi pixkalutu wane: chalu gowukalu ga wa mowukatu; wane koxlu tsruswalu ga wa mtseruswatu. Chalu tsruswalu walenwa shima tsrokakapje sajikachiripa. Chalu mtseruswatu walenwa shima tseyoloto sajikachripa.

Chawo

Gipowga spuwngako gwachrini chawo, yoklutsoji, yoklupi nika. Wugenewatini girukotpotutna wa ma mujrukgatinitipna; girixanu gi wa rumata shalewpotutana.

Ga wa yineru retinina shiwrekmejita ga wa saplewjetana: sheen sheen sheen, china sapleta. Ga wa wugenene jeminitkalu rurna saplene rujirogamtna gowukshimpotu, gitokga rawna gonnipgalunni chawo.





Chiklu

Gosha gwachirini chiklu, tsomipje nika ga wa yineru gigkakjetachrini: chri chri chikga, chiji rapoka rupapjeta ralnamtatnaka. Tenoplu rapoka, chikga china, waneklunwa, rugkalewpotuta tyetkani chinreni. Ga wa: chri chri chri, chinini, waneklu mrixu reta; seyni chikga chikga, chinini, rugkalewata maleshini chinreni. Waleko rumatyatka yineru.





Chikru-chikru

Ksatu spuwnaga yapachrini chikru-chikru. Kopajipje nikachrini. Mgaluklupje rixini, waneklupje getkalurni wale. Ginapuklu gi wa retka, ginakakta yatka. Ksatupje rutaka najita. Chipetawgenetini tenpotuya wane rujrukya: see see, china mejimta, raluka yotsnaklewleta; ksatu yapachine rayegixpotuta.

Chino

Chino chigkalurni sato paranta pixkaluto, seyni satumnu talukika pinrechkojni. Nikaluro sero tixinitka gerotopuko tnikika, pochwajpalu tkamrutika. Walanwa sato paranta gogawalpotu. Ga wa mturune gannapotutlo chipetkajetyalona tserowatini. Wane pnute koxa, ginrochi mturu twugenetini tajipashrimatyalu.



Chipatleru

Shikene molni chipatleru. Gi wa tsruni, seyni tenpotu yapachrini ginakakokta. Rumkata gapokleta rujganikletini: kajiruji, tsomi, kasaprane ga wa koshichiwgene rannapotuta. Gixowgenerni, gagmunapna rutakawgeneta. Yineru retini gijiwu potuko rapokanshita, komrekapa: kshii kshii, chinjeta.




Chiretu

Gosha gwachroni chiretu. Wanero gepi pixkaloto, klatalo, serolo. Yine kowatanroni ga wa pirijeretlona. Wane pnute toklo tnikika, kanawatsigitachine kanawa kamrutyalona, Rapokyapna wa gipjina. Ga wa tomuna kamrupnatna polero, gapro, kokaskonru wane rutaknagita, rupwerewgenetinpotunanukna.

Chkotu

Gosha gwachrini chkotu. Satumnu kajiruji nika wale. Gi wa rapalushata, gixolurni. Shikalewatini, wane china: soo soo soo, rujgamoletini. Gosha jemikoklunu wataksu ratlapjenanumta tsomi rujgiyawaka. Yineru retini: chko chko rujnotkoxa wane pnute rasukatka. Gipixi ralukpotutyaluna wa yine, girixanu wa suxo, maklojpatka, wale pixi, sagatanutkalona, wa tumkata kiglemanex tixinripa.





Chokoru

Yineru kamruni wa chokoru. Kiruchrapi kamrutikalurni ga wa gijri, yomuwa kamrutikalurni wale. Gitsa yoklushyopi sajrutikalurni. Tsro shima yoglotikalurni gimrurukachro, tsrugkakaklu. Walapuklu yochpikgalu yoglotyalona tsro shima, walanwa: wakawa, kayonalo, charawa, gamjiru, klataknao ga wa katsalo.



Chotu

Gishaga gwachrini chotu. Yine pikanruni girixanu rashigraglewata. Kyowikolni, yajripnalewatini gi wa rushpakatka. Waleko gimkata kamaklewleta. Nsogapje pinreta wa rumkata gishpakletinripa. Waneru ksajimtaluga wa popnimtaluga. Kgachijiwaka ralukpotuta.

Chowretete




Satu koshichni kapayaluko gwachrini. Gagmuna payako yotsnatachrini, tsoni rujgiyawaka nikanropa, ga wa tsetse koxa nikachrini. Yineru retini saplewjepotuta: chowretete chowretete, china. Yine galuka puratlepotutlu, kshinikanurni wale.



Chpichpi


Chpichpi satu koshichini pnunnu gwachrini gi goshpotunanu. Serolo, tsetse nikachrini.

Gepi najjipgerutni. Gina retini: chpi chpi, china. Yine galuka puratlepotutlu wale, gasruga puratkota.





G



Gachijri

Gimtaga twa gachijri, gitawakapna ga wa sotluchpale twajeta. Yine gannapotutlo gachijri, girixanu ponikgalni tuwlatkoklunu, gimka kagitpotlo seyni poniklo.

Gitawakapna tutaknajita, pwalostugnajitaa tixa, ga wa poktestugataa tixa gipawshinanuktalo. Wanero tsuru gajero: polestugalo, gotwapoktepatalo, gotwakashaptolo, ksajistugalo, gotwageprashpatalo. rapga gajero wane pejnu wane: mostojito, pwalolo, gotwagopajripi, molokoyo, kawshistugalo ga wa machaji. Ga wa gipowga gwachroni: tsrokakalo, katslastalo, katswestalo ga wa tolojrugachijre. Wanero sato gosha shanga gwachro, tsojrini wala.

Gapijru

Yine gitaklenwa gapijru, panchistsi gitaakalurni, kashriptostsi sagatkalurni, ga wa sagagojitkalurkoxni, wane pnute pinrechi. Waneru pwalolu, kshoteru gapijre wale; serolu, walenwa polero gapijre chigkaluru, ga wa sergogolo klupashkikitaa rixa. Natga rurini gapijru sagagogita rumatikolupa, wane china wutsukatenni. Xani yine gitakinri gapijruji rushagkajetluna gi rixanu kwenru.





Gashgaji

Muchikawpotu wutsrokatenni kamgajenatlu wa gashgaji yonatkaluro. Kagli kamrutikalurniwa gashgaji sametayma, gapacharama ga wa pinrikaka. Koyga wutakjetanruni ga wa gonga. Muchikawa Gayopagota chigkaluru, kagli chipetachri, wenutkalurgimni wa kagli. Pagixanumnugimako kamrueyegitluna, wale rumuta; waneklu gima gi wa rutlatyana. Kamrutapluna gashgajgitsruka kaplalu. Kigle yongalpotgimlu yineru yonga.




Geklo

Gagmuna pata gwachroni geklo, kantsupatle tuglereta gwaleta. Tyoglolewatini gi pachinonanuktalo, waneylo walako tpinre tkashanate walepje gitukchinrekaklo. Yine pikpotutlo, giylatinro rupjklona walappa ranomyotna, waneklu gima kachinsojna wa jejine rugkinri, satu nikchi giyampotu rupnana. Suxone gima gi gimagka gixo pawna, seyni ruwlagapkata ruwlalna ksajimchatagro geklo.

Getlo

Yine gitakleni getlo, wanero tsrokakalo, kigle tsonuro ga wa mtserkakato, walanwa goshgajero. Mchira, katsnalune gannapotutlo. Serochrajitaa tixa, pochwapotlo. Tsromunpotni getlo popnisagitaa tixa. Panchistsi gitakalurni gishagkajetkalurni, pejnuruneko gannapotutlo. Psutsojitinro tuplakwagatini gi tenoko twiya.



Getu

Tolojru gosha gajerni wa getu, tenopna twa, yotawunjetinitka tshikalwata: gee gee gee, china. Wrolgapje turjeta. Gitsronanukni seyini gipsoplajinanro. Tomane ksajjylo, toshawrugapje klataylo.

Muchikawa gima tsrunnini tayinerutyegita wa getu. Giyagni Getunero chigka, yineru tganurutinitka, wane twugenewatya, toyejewlo gima yoprejatanro tushpagragamtyanatka wale patewle tasukanatka. Gipnanshikanutachro gimni gosha yanatka, xani gognenanutka.



Gipetu

Katslusha gajerni gipetu. Katsluklopaka nikachrini. Goyechno ksatu rawjeta, wane shikalwajetya: smu, mu mu mu, chinjeta. Santira koxa nika ga wa kochkawaleklopa. Gepi pixkalutni wane: katslupeyri; klatalu, tsrupotni wale; walenwa muxotu, wale gi wa nikpotutka. Serolu galikaka niikalurni. Gixowgenerni klusmotataa rixa.



Giyalu

Giyalu walenwa goshgajeru, gixolurni wa giyalu. Ga wa kmaturni ksajiptsetutaa rixa. Waneykoxlu gipochre, walenwa rumolipgatinri ma kaspukakyapna.

Kyowikolni ga wa niklewatachrini, gixowgenerni, yapashawakle yapachrini, tsruru, gipowga koprugatachrini. Psoluko nikachrini, seyni konaji, jinri rannapotuta.

Waneru gixo pixkalutu: manxineru, tsrupotni wale klatamyonotalni; koshichineru; kosopaneru, walenwa chowgurewata; ga wa payoneru chigkaluru, gi pagogneko weta, gipiranapje wjemyalu. Kginrolni giyalu walanwa Kmaklewakluto mtengatwenu gwachro. Wala gimni chipetna, pakatkakapje tkoshpakna, waneklumwa retka giyalu.



Giyeka

Gosha gajerpotni giyeka. Rapga jiwuta ruglereta gwaleta, wane sotluji, gitawakachraji. Yonwaloji nikjeta ga wa gorochraji nikjetachrini. Yine retini wajraya ralnamta, pijj pijj pijj, chinamta. Ginshi kigleylu wa gepnopi, gimekagin-gima yoptekpetsatanru, waneklu wajra yanatka. Mgaluklu rugirewata wa giyeka: gmm gmm gmm gmm.

Gipsonajinanru gopshi pnute najru, gepnajipjeru, yine purata wgenjetlu gaxawripa pixkalutni, serochputajritaa rixa ksajpowataa gixachrini.

Goma

Gipowga twapotuta goma, rapga ga wa tsuru koxa twajeta. Pewnaygirpotni goma, tseytatajita tixa. Mapa pixkaloto wane: klatalo, seroplajiro ga wa mtserkakato.



Yine galixleya yayixachri gima gi wa niklo, ragakchinyegimata yayixleya. Mturo tixini kaygirotkani, kopaji kagituru, nikchigitkoxa tnika. Gi wa suxo mturoneko niklo, girixanu giyampotu tuxrewkakanunro.

Gopshi




Kamejrni ga wa gosha gajerni wale muchikawpotgima yinni puratanruni gopshi. Wale chinanu waneywu gopshi, gaxawripane gipxaletachri gopshi. Giyagni wa xani gepi pixkalutu gopshi wane: gopshi gosh-gajeru, ga wa prachi. Goshgajeru gi wa tsrupotu rumkata gijganikletinripa ginakakokta. Kigle ganoglerni gongaya, seyini galikaka gi wa ralnapotuta. Kiglewgenerpotni gopshi, pnumnu rixyongatna. Ponikgiturni gopshi, seyini yine pikanruni kwukale rixinri.


Goshiyolu



Goshiyolu kapna, kapayalu gishalemxigi gwachrinwa. Gaxawripani nikjeta goyecho chowguwata nachirixini. Gipaposnupixinanuktalu, seyini wa gimane ponikolni, niikaluru koxni wale. Ga wa gingi kigleylu giglostalu, yoshkiru ga wa mochinmenu wa suxoneya.







Jema

Tsru nikchini gimtasha gwachrini jema. Nso rannapotuta, gatliri rashigata. Gimata yoknappapotutachrini, rapga ga wa tsuru. Waneru klatalu, ga wa satu gimole magka gajeru, popnita rixa, gi wa tsrupotni wale. Mturu rixiniwa jema kayompotuwalu, kigle knapotlu klatgayongaa rixa, kyenewaklenu klunerukta ramlutini rumtuwna rakaplepleta, teno yigata, suuu suuu suuu, china. Wane gima chinna tsunnini, shii shii shii rujnutini jema, shiji giwaka rukshikna. Yine gishalwapiranatachrini.

Jiji

Sana gitaakalurni, nachichinna wa yine, walako ruwlatatkana ruknoonachnetinripna. Wanero gojiro ga wa mojito.

Shijginro gima yanumatini, tshikalewatini, waneklu gitaakalurni wala gimni wa gojiro gishpakya, ga wa klunerpapkokta gitakaluro wala gimni wa mojito.






Jimeka

Sana gitakalurni jimeka niika, rurka. Waneru jimeka pwalolu, klatalu, kanru, kangaji pnunnu gixachri; gepimole pnute pixkalutu wumata. Wixa yinwu wumatgitakpotutlu jimeka, goyechnokawpotuko rutaka kasagi rixinripa. Kamaleji ruksoljetka kayi sreta, wale prika rutakatka suxone gitakinri rashyapojita. Koya kamrutikaluru jimeka. Kapiranalni jimeka, yeye jema gapka gongimla gitaklu, wale genekyawu. Jeji ganikinitkalu, suxo gima gimatlu jimekgonukla wale chingimata.


Jinri

Rugawaklesha gwachrini jinri, ginapuklu kagawlu, nikchine chiji yapachine ga wa kamejirune gannapotutlu. Gepi pixkalutni: gosnapajiru ga wa poprolojiru kashejiru girni, suxo ga wa jeji wane. Gi kigleru kayikikolu wa jinri, giyagimni ratskotanruna gigawa gistakletinripna. Jinrisha rugleretpotuta yeye Mapchiri, wale gonra girukotlu.



Jipalu

Gitakluni jipalu, pnunnu rixsagita, gowukalu, poprolsagiru, gosnapalu, waneru klatalu, pwalolu, serolu. Yine galukpotutlu koya yapjetyapluna. Jimeka tskala rutakaa, ga wa ksatupagi, tsru sagi rixyapa. Muchikawa tsrunninni genekyawu sergogolu –gogru jipale, ga wa pwalolu –sensewlo jipale. Waneru klatalu gasokariji chigkaluru, yalamamtatachrini jipalu.



Jito

Kyoprurensanita tixa jito ga wa popniro, giyagni gi pgujetanro gimxigiya tyoliwjegasukleta. Suputa gwachroni jpirone ga wa gapashirone, gaxawripnaji tannapotuta. Wane chinna, jito giylatlu gimnune kamakalune, wale chinanu nomatsane tomta rumletna. Walangi gima kigleypotlu yoshkitachri yineru, giyampotu rutuka.





Jiweje

Kiruje kamrutika jiweje, xani gognenanu wale ruyatsatyana yine suxone. Wapgumko jiwetna masu swaga chichipagiyma. Wane pnute waneru gepitsako sajrutikaluru sepukle, wale kigleylu mkachri saxpalu; ga wa sajrruru waleni kashri gostujetikolu. Kaglijpa kamrutika jiwejepro, rumkata giprigletyapa.

Jixolu

Gosha gajerni wa jixolu, tsru gagmuna gwachroni, walapuklu tujruka gi wa teno tyatka, wane tshikalewatya: chru, ru, ru, ruu china shikaleta. Muchikawni tsruninni walako rumtapyanina ganikaji walaputkani chinnina. Jixolu gemapatachroni, katajpajitaa tixa.





Jixri

Gimtasha gwachroni jixri nikchine tskala. Gimnune yegi twa, gogru, yonalu Gannanpotutlo yineru koxa nikannutlo. Wala swaga kowi kigleylo, xani gognenanu jixri swaga kowityana tomgakikolna yine. Watjirunni runanshichluna makluji, makloji, kashichyaplo suxonemkoje gima xako wugenetanna, ga wa kamshiro nikinro kalya tskaglu mturo, gi wa rumata yanumatana, ronnuakashatana. Kyowikolni, klunnupataa rixana mturni.

Jixriji

Gepi pixkalutni jixriji, gimtasha gwachri, ga wa magka koxa rawa, waneru pgamlu munalu, ga wa posmunalu. Tsrū munalni kanawa kamrutika, magka gajeru. Gimtasha gajeru koxa, kigle. Giyagni jiwatini gimtasha gwachri klatastalune gannapotutlu. Tsrūnnini genekyawu magka gwachri shikpotlu, gimtasha gajeru gi wa royakawata. Klatastalune nikajitinri, gitokga yatkana kaplalune kamrutyawana.




Jpiro


Suputa gajerni wa jpiro, jito gipxaletachroni gi wa tsropotni wala, gitokopna gwachroni gipjita tutaknajita. Giputu gigleretachroni, tjitgognenatlu wa chiji tutaknajityawakapa. Giknokaluru tnika. Gajerya tserownini terotetnawa. Mтуру wugenetachro giylatinro wukalewatana, ronnushatana mturni. Mтуру gikcha tnikini waneklu koxa yosronnuta.




Jwepi

Wanga gagerni kanawanpuko taluka gipxaklepotuta ga wa kyowikolni, tjielokmanrewata. Wala gima gipxakinro wa kanawa gipaginnu gimananutkalo, giyagni yapapgatnipna yine retjetanrona totjimpuko, teyaka tixyapa kanawa.





K



Kakwalu

Ksatu gitakalurni kakwalu. Santira, chiklayo rupxaleta rutakikowaka kakwalu. Mapa pixkalutu kakwalu wane: serojiru, katslajiru, pakniji pixkalutu. Waneko pixka rixa yimaklemtwuna wutsrukatenni. Kakwalu putakinipa, gi wa taya ga wa gachijri pnikanu girixanu knijeyanapyi putakle.



Kamaleji

Wuputnesputa wutaklu kamaleji. Gixo pixkalutu kamaleji wane: tserpinre, yasamenutachri kamalejite, myamtugwe, tlajripi, pinrechi, galukmenu, giylalu chinanu, meynuchi ga wa kwajgojmenu. Giyagni gi pmagnaytaka gitakletanru kamaleji.



Kaskiru

Gloklumuna, tspatamuna, naragkamuna kamrutika kashiru. Gi wa pixkakakluni kaskiru, waneru mojritu ga wa gojriru. Kaskiru galikakpotu, mtserkakane kamejirune gigkapi. Giyagni wane chigka, pmaturewa kopshini kaskiru gapka pmuchi paprinti gigkaletini wane pnute pimri kashri.



Kayatu

Gosha gwachrini, kapna rumkiya wane koxa wugenewaty. Jimeka, shiji, paranta nika. Kojwakpotunatkoklunu rumnuta soklupita. Gepi pixkalutu kayatu wane: popniru, waleni wa tsrupotu, ga wa kakwaluji chigkaluru, walenwa mtserutu. Giyagni wane chigka: gegishpaklu pwugenetini gi wa kayatu pnikanu, girixanu gitokopna ranika samenuanru mturni, wukalewatana.

Kgichimajruto

Tsomi katajiygalerni, kasureru ga wa kasapra tnika. Goyechno tyanjeta kaplurune tapatjeta, wale tkamrupjitya. Gogistsi tshikalewata, wane china: chichiplus, chichiplus. Wanero gepi pixkaloto kgichimajruto: chichiplus panatachroni ga wa kamapalni. Tsrone kapokone maturewta pinna najetlona kgichimajruto powa, gipagogneko ma magatyapna chichi, ga wa kamrurwaklerune rixyapna.



Kina

Gimxiji tenpotu, wane ruglereta gwaleta kina. Wane runya kajiruji nikyapa: getlo, krapru, pama nika. Shikalewaprikatini ga wa gina retini wane china ruglota: uuuu, oooo, uuuu, ruptajrutlu walerutu gichko potu rixlu. Ga wa retlewatini rutotota wane china: toto, tototo, tototo. Gi wa rumata pimrine nikchine gipxaletleta, wanna mkoge gijga nikleta, rumajewkakna rali nikletinitka kina, gimxigi yatka wane rumkagognenatyaka. Giyagni wane chigka: xakoka kinapla nikapna mturune, merenni.



Kokopi

Chiji ga wa tenshegi gwachrini kokopi. Sana ga wa panchisputa rawjeta kokopi. Rashkalewata seyni gi wa kamaklewata. Wane chinna tsrunnini kokopi ginroni mapyolo. Waneko pixka rixa gijretlewletna tsrone: xako pumoleko pkajrukapa kokopi, kochipjetanunyi.



Kolpeto

Kagli kamrutikalurni kolpeto, muchikawni yine nikapreni. Kolpeto gipxalni kajpapago, kajpa gimatu ga wa gashgaji. Giyagni kolpeto pkamrutinipa gi wa putsolguwatanu, girixanu tupgotininyi pyoxiklewatininpatka. Serolu yongaji sagatka kolpeto, ga wa yineru yonga klatalu yongaji yonatka.




Koyano

Wanga ga wa suputa gwachrini koyano. Jpiro ga wa katato nika. Pakchane mole koxni wale. Shikalewatini wane china: kia, kia, kia, koyaaa. Giyagni wane china shikaletinitka panchi ginaple rawa shikaletini, wane chinna yine: gaga, katu nachne paktatkani. Patako wumolene gowuka ginyachine gapyegitanutkawu chinna, kagwakashanatatkana rapyegitikolupna. Wale ralixika koyano.



Kshimuna

Gimtasha ga wa magka twa kshimuna, mapa pixkaloto kshimuna wane: tseysurero, tsrosaturero ga wa yotlomuji chigkaluro, sermunataa fixa, temunatini tushpomunata. Wa yotlomuji chigkalurni wa yayixlu kigleyalo, ga wa pimro, chichi wa gashgajine, kolpeto ga wa kajpa gimatu yoxikikolni kshimuna shpata.





Kshiyojru


Gonu gwachroni kshiyojru, wnaga tolkajeta geme rixini. Shima tnika ga wa supru mapchiri tupxaleta. Gepi pixkaloto kshiyojru wane, klatalo ga wa ksajiro, walani wa palma chigka. Waneko pixka china yimaklemtatkawuna wutsrukatenni. Giglu kigleyalni kshiyojrungi.



Kshoteru

Gosha ga wa kanipreklü gwachrini kshoteru, jipaloji ga wa jimeka sure nika. Gepi pixkalutu kshoteru wane, serolu ga wa ksoliru, walenwa gogetkogakleru kyowikolni wa tye ksoliru kshoteru. Giyagni xakoka chigkana yine, gegishpaklu pwugenetini gi pumkata giylaletlu kshoteru kwukalmenni, kyowrutni.





M



Managi

Kapna gwachroni managi. Yine pikanropotni, girixanu kachinolni wala. Wanero gepi pixkaloto, ksajiro ga wa sergogolo. Sergogolni kachinolpotu wa ksajiro pnute. Goyechnokawpotuko tushpaka, tujga nikleta. Tumananustsi tyinuwaka satokletatka, chijipna tyatka. Wane pnute kayi chininitka, tyinuwaka gishpakletatnaka.



Mano

Parantasko ga wa panchi gwachroni wa mano. Yine pikanropotni girixanu tashkalewatini, gimnu chino pixka fixa wala. Tnikanruni gagyo, kasapra, shimtatajro. Goyechno tujga nikleta. Chijipna twa, wane tutakawgeneta.




Manxi

Walenwa satu tsru gagmuna shegi, ga wa pakatapje walapu jiwatachrini. Serowatinitka satumnunanuka nikchine nikanruni: koshichine, chkotune, knoyane ga wa yine koxa nikanruni. Manxipata koxni wa pinrechi, gijpaglu pinreni.

Mapchiri

Pnumnu nanuka gwachrini mapchiri: rapga, gitkomga, tsuru ga wa gosha koxa rawa wale; tengawaka psolgogneko nikachrini wa ganunroni kshiyojru. Mapchiri nijitni kshoteru koprugatinina. Katskerolu rolkajetya. Gepi pixkalutu wane, ksajiru ga wa myamutupi, walenwa kyotmoleru. Teno twanatinina polerni wane potuko rugkiyanro. Gingi kigleyalni wa ksajiru mapchiri, yoshkiru ga wa suxo chinowatini, walengi ruspasatutlona. Kapiranalni mapchiri rapga kamrutachrini, pakatamnunanuko reknokamtini, ruwnokgamta rapga. Pakata sato yinero wugenewaty a wale chinanu yeye wchinru.



Mchira

Mchira-nwa tenshegiko yapachro, kajiruji tnikpotuta. Twiyawakni magkamriji ga wa rapga jiwutkaka. Magalewjemtinitka tyinuwaka gixowanalemtatka tugiwatatka, waneklu ponikpotutkalo. Muchikawa tsrone kashriko rugkapyalona. Pagwenepjero mchira ginapuklu tushpakawgeneta. Wanero gepi pixkaluto mchira, mtserkakato ga wa klataglawalo. Tnijitni: getlo, shichichi, ksuryopate, jinri, pama, mayoto, pochwaploji, manxi, krapru, pchechi, kiru, kanapama, kapalu, yagyi, chiretuji ga wa tsetse, kasaprane, pimrikaka. Tsrone gimekaginna rantamyotna katskole rixinripna ma mushponyotinitipna.




Mgenoklu

Gichkolpotu ga wa tsrupotu mgenoklu, kyowikolni, seyni kigle yongalpotni. Poyolirni, gosha gajeru ga wa gonu gajeru giylatachrini. Rumata girukota wgenpotuta, rogluwgeneta. Mgaluklu rushpakawgeneta, pawalapkaka wugenewata. Chijimtachako ga wa magka mriji gwachrini. Walapuklu rugrijeta: goo goo goo, china. Pamyo pixkalutu wane: ksajiru, klatatskata plajiru; popni yongalu; serolu ksajiptolu; seryongalu; klatyongalu. Mgenoklu seryongalu walenwa

kmatsurpotu.

Tsla ginroni, Yakonero, giylatachinni mgenoklune, wale chinanu Tsla nikatanunmakna mgenokanepni, walegnapu gima mgenoklo kamshiro kaptomta, gi gima taluka gakaxikletatka, wale chinanu ruxolewnanatatkana mgenokane. Giknogno walanwa mgenokane ginro, Tsla gognetachro.





Mkachri

Tsrunnimkalni. Wane gima rixa gikshikletluna wa mkachri saxpatikolutka, jiro Shwagkalo wala yimakatkalo. Wane gima chinro suxo muchinangapka wapgu pjiiganu, pjiwetanu ga wa psajrutsatanru. Paliximpatka, nyimakanutkayi wa psaxpatinripatka. Wanepnutgima wane chinro, waneru jejinemkalu ga wa saxonemkalu. Palixa saxpaletimpatkalu, pyonatanutkalu tlipiyma, wane pnute ksajjipalu putakanutkalu, rumkata ksajiyonga gixletinripa. Wane rixa gikshikletluna mkachri kayonalu.

Mosjiwu


Sato niikalurni mosjiwu, sanako gitakalurni, tsanaro pixkamka tixkoxa wala. Jena sure pixka fixa. Tusalninitka kigle jitotkotkalo. Muchikawni tsrunnini gognetkakahroni: wala minjemka, nikawnashatanna yinni. Xani shatka gi wa gixo yine gitakatkalo seyni galikaka wutakanro girixanu wutsrukatenni genekamtyawu.





Moslo

Moslonwa sanashako gwachro. Tnijitni kasureru. Wane pnute pinrechkojni wala. Chinowaygiru ga wa gagkananwakluya. Waneylo tkachingate, walenwa talukika. Tujnurewatini gipachwunanro pospotlo. Pnumnu gixachro wane wa moslo: polero, ksajiro ga wa katajjiro.




Mrixixi

Walenwa gosha gajeru gepkoxamkoje jixirutu. Ga wa nikalurni. Nijitni: konaji, kajiruji ga wa gatleri ruprurugle nika. Rumkajetyawakni gagmunapna yawnachri. Mrixixi koxa mgalujpalu kawjetachrini, gosha gajerujpa. Gepi pixkalune mrixixine wane: tsrukakalu ga wa mtserkakatu. Pnumnunanuka yapachinni. Yine nikanrupotni, gimta koxa kwenuyilu ga wa tampora koxa kamrutika.



Myamtujwe

Myamtujwe-nwa satu gimnu yosrolotachri, ga wa kashkalerni, waneylu kachingate kamakalu. Rawyawakni kapna ga wa gimxigi. Nikanruni kochine, tolojrune, jpirone, wanawana nika. Pnumnu rixa sagleta, popniksajnuru. Ga wa kanaji rixini kmatspotlu. Giyagni yine pikpotutlu. Ga wa yinerni rashkalini ruxpotutko gi wa kamshiro kagragalo getanru, kamakalni.





N



Nala

Kasureni, gisure ralukpotutyaluna yine, panchi kamrutinripna, gwikowakapa. Ga wa giji nikalurni, waneru pochwalu, nikchine koxa niklu. Gimtasha rupchekpotutya tsrutwansureni, ga wa gachpojru chigkaluru, magka rupchekya mtsersuretni, panchi koxa kigleylu wale. Polero gannatanruni, yopixri koxa nikpotutlu, chiji rujrukini kayatu pejri niklu.

Nashchi

Nashchi tkamrutika tuwutumta, nikchineygi, shakapaji, pgimejiro ga wa makolugi, sroschi proji koxa tupxaleta. Nashchi tkamrutkoklunu yineru yonga tutaka. Pjnuruneko gishritachine kigimawatachine shiyoletanroni meyiwlu chinanu, kigle getkolune rixinripa.



Natga




Natga, walanwa gayapa wchinanro, walani sato kshana gitakalurni yayixlu kigleyalni pinrewatachroni; nato chigkatka wa turkoklunotka, girixanu kpashirotkani tumkata pinrewletinripa yayixa moletachine ruxixanna.

Mapa pixkaloto wane: klatagwuro, walanwa girka; pwalogwuro, walanwa gamgalutkaluro; serogwuro, walanwa kamaklewatachro. Masu mture, kowru, wala turika natga.

Niikaluru

Walenwa kagituru golotu, jimiluru gajipoyro, wataksururo ga wa giwlalo. Pejnuruko gosha gajeru niikaluru waleni: jema, mrixi, giyalu, kshoteru, kayatu ga wa pimrikaka. Kamejirune: giyeka, totumta, kanalu, yoko, tseklu, pimrikaka. Wane pnute koxa gitakluji niikaluro: porotoji chiklayoji, garoso, shiji. Wane pnute gone gwachine niikaluru shimane: kapiripa, patlu, tsoklu, gixoygiro, myamutu, tukamka yanatu. Wane pnute koxa niikalurkakni: knoya, supru, chkipu ga wa pimrikaka.



Nikapi

Wutsrukatenni muchikawa nikapinri kolpeto, nikchi yoptopi; kajpapago, girikaluro; kotajipi, tochkegi. Kagli kamrutikalurni. Ga wa xani wetatkalu, satumnu nikapi pnumnu gixachri: kochara, taso, plato, kochiro, trinchi tuka yanata.



Nikchi

Nikchi chigkaluru, walenwa pejnuruko niikaluru wanna-nwa: jema, giyalu, mrixi kshoteru; pimrikaka kamejirune: giyeka, totumta, kanalu, tseklu, gixixi, polero ga wa pimrikaka. Wixa yinwu pejnuruneko gosha gwachine nikchine wchinru; seyni wane koxa mnikone. Wanena nikchi gijgakalumpotu wannani: mrixi ga wa kayatu. Galnachine: giyeka, yoko, tseklu, totumta, kanalu ga wa polero; wanna-nwa ponikgiturpotu niikalune. Ga wa jejjine yine giyolikjeta, nikchigatna, ranikluna: kashri, chichiksu ga wa gitseklu koxa kamrujeta.



Nso




Tsru gagmuna gosh-gagerni wa nso. Tenru ga wa kaji rixinitka, serowatinitka niikalurkoxni. Yine ga wa jema koxa niklu. Ga wa suxone gisotanruni wa nso, tsrone ga wa maklojine, waneru nso gepkoxamkoje pixkalutu:


- 1) tsrukakalu nso, nsogonru;
- 2) mtserkatu nso, chkotgisne;
- 3) mtserkakatpotu nso, pusergisne.


Nso gima yeye Mapchiri genekyalo wa sato yinero Geryana, giwokatletachro. Gognewluklu, tya gasukletyawakapa. Tkochippgimatatkalu, tseruwnagimmtatka pakatamnunanuko. Wane rixa wa nso.

Ntoje

Ntoje gagmuna ptajisko tutaka wala, wane tupchekyatka. Pwalogwutaa fixa wa ntoje. Ga wa tosagi serotaa fixa. Tserowatinitka tujrukatka, waneklu tyotskogatkatka tjimikolpatka. Pgamlusagii tixatka ga wa ponikpotlo, pochwataa fixa. Ga wa mgaluklu yine gisanatewatini, waneklu koxa tutaaka ntoje. Wane pnute walepotu walapu tserowatatka.









Pawo

Satu prachni pawo,
giyeka pixkamka rixa.
Gijri, klusronotapitaa rixa.
Gaxawripayma tseruwaka, seyni
tsrupotni wale. Shikalwatini:
kaloo kaloo, china. Ga wa
ginaji katslanajitaa rixa. Kapotini
paksurpotuko kapnajita.
Muchikawa gi wa pawo wchinru,
nikarawa wchinaplu, walenwa
giwakpotu yineru tokanuya.

Pejri

Pejri muchikawgima tumangapa,
suxo gima fixnawa, wajirgimnitkani,
girixanu wala gapka gima
gimata koywuka. Seyni xanishatka
nikchinatkani, gosha ga wa sana
twajeta, jimekajerni ga wa kajiruji
nikachroni. Pajimnunanuka gita
kachrogimni tkapnagimjetlu wane
rupchekya, giyagani wa pejri
tumatka kgijrerni ga wa tutaklewata
wane rupchekya wa kajiruji: nala,
kantsu, shichichi, kastanya, yoltomuji
ga wa jinri.



Peslu

Tsruru kmigi tengawakpotu gwachronwa peslu, gixkaklo gikta tixini tyenewata tomkajkakaka. Mapa pixkaloto wane: ksajiro, serolo ga wa popniro, walanwa yopakaje chigka wa mtseroto. Kwugene tixini kmatslo tojrota tkosennipgatya. Yineko pixka tixa wugenewleta tashichakawgeneta, shima tnika, tsro shimkoxa tomkanjeta, wanga tyospakajetanna wane tuylajetyanna. Muchikawa sato suxo gagyekachropmaka tyomputjegimamtlo wanga gima tutaklo, tognetskaklo tagyekinriya.



Pipxo

Polechkolni pipxo ga wa kyowikolni gimka tsroni, yine pikpotutlo jimeksure tannapotuta. Gixo pixkalutni wa pipxo. Wanero potsojrijipitaa gixachro ga wa tsrojiwuro, walanwa tsroygalero giptekachro ga wa tsrotnumtalo. Wanero sato yinero goji pixkaloto, serospuu tixa, yine tetini tapchoklewata. Muchikawgima tmanewtapa. Kiglee tixpotgimata mturo gepisretgimako twaygaleta, totjimne gima pipxoyni ga wa tostajreta yineroyni.





Plejnako

Satu kamejirni totumta pixkamka rixa, seyini shikalwatini gipsopljinanru, wane china: plejnako plejnako. Muchikawgima meretnitkani ranuru gimagka, chanixlu rusanatewatyapna rutakyapluna wa jixriji nikanrupna.

Makgimakta mamernu poga kachropiri yotskatagatnatkawa saplewjegimanananumtanatka xani gognenanu ksejrepotlu. Gixo wgenru wa plejnako: jixriji, yoklupi, jgijeroji nika. Ponikgiturniwa plejnako.

Polero

Polero walanwa kamejiro goshgajerni ga wa gipxaletkakachroni, serotaa tixa topatleta poleylo klatgojro. Nala tnika ga wa pimri kajirujkaka. Gatliri tnikini gixomsagpotlo, gipjita tannapotuta. Gixo pixkaluto wane: tsrojiwuro, walanwa pamlo chigkaluro; tseyonshipiro, walanwa tonshi galukikaluro; ga wa polta chigkaluro. Kajiruji tnikini pnumnunanuka tuknopyejitlu wane rupchekya.

Ponikolni wa polero tuwlatkoklunu. Xani ginanshichkalurotkanwa polero tugkikolu. Xakoka pugkaploka kgiklukanurni, chopijpa kamrutikalurni wala.



Ponro

Kapayalu twajeta ponro, gikta tixini gatnu gapo tukshikika gixkaklo. Gepi pixkaluto wane, ksajiro ga wa pwalolo gopiro. Kapayalu pagi giwekyachroni wane tutaknajita, waneko tuxolewniya gixo jixirni gi wa tniika. Yineru yanamyokakinro waneklu gima rumata tumlejita.



Protapi

Protapi sato katato nshinikanmakni, malgone waka talna. Gelikoptero pixka tixa. Taluka kashletkoklunu, talna tenpotutya. Ga wa mturu kashichinro tseprogkaklu gi wa rushinika ginaka rutakamtlu pagixanu. Ga wa katsunpotu tixlu.

Gonu kapchogalu gituglereta wa protapi, girixanu teyiklu, gi wa taluka girletlu girixanu tyayixanuna wa tupnanuna.



Ptsetsru

Walenwa satu koshichi kiglerpotu pnunnu rixpaxita: serolu, pwalolu, poleru, pakni, ksajiru. Waneru satgagmuna knijeruji chigkaluru, wale jiwatini, wane nikyalu wa ptsetsru. Serolo, tsetse koxa nika. Wanena yine gimatgajpokpiranatachine wale gajpokalurgima gipagalukogimananru. Yine galuka puratlepotutanruni ptsetsru.



Puseri


Gimxigi yapachrinwa puseri. Pagixanumnunanuka nikachrini kajiruji, putgana, shimtatajro koxa nika. Pwalgogo gatajnupowataa rixa. Chkotunepje rupxaletna wa yaglotatinna suxo kanshiro nikingimlu wa puseri pwaloo rixgimatwa mturu. Yine galuka puratlepotutlu. Niikalurkoxni wale.

Puyo

Gonga gwachroni puyo, shima tupxaleta. Rapga gagerni ga wa gipowga. Poprolo mchatataa tixa. Tnijitni: kopaji, kamalu, yotlo ga wa machaji.

Tsla giyakleni wa puyo, mapalosure kamrutinroni pagognepa. Wuklopishanepni tyoglojenatanu chigkalurni. Wanekni tixa xani gognenanu.

Takapshotkoklunu tyoglolewata kachinpotlo; wa putaklewatini, gi wugkata nikletlo puyo, girixanu tkamakatlul gitaklu.



Pwachri

Pwachrini sato tolojru gitsroka. Gipshini tpalkakananro, gipso tpujananro, klopochataa tixa walani, tolojrune gitsrokate magka gwachroni. Ga wa gina tetini, kapna tshikalwatya: pwaay pwaay pwaay, china. Kwa mongimataa tixa shikaleta. Wale rumatika ginaputkani. Gonu tepuka girixanu tonunnagatewatanatka. Ponikolgimni wa pwachri, panene nikanroni.





R



Rapchakgale

Walenwa gonu
 gishpakgatyawaka gi wa rumata
 gipriga rushpakga gognenata,
 gonu gitokchiji ginyachrini;
 girumatka ginaka ruyakaty
 gewiko waka pasretgogne.
 Miariya jiwuta magka
 rogote rawa rapchakgale.
 Kaplalgapga jiwuta koxa rawa
 satu rapchakgale. Mashinteru
 gitspalakle jiwuta, rapukote
 rawa rapchakgale, Gonini
 sreta koxa rawa. Giyagni wa
 gonu gipachikle gananru tsru
 magka powga gishpakyachrini,
 girkalurkoxni wale.

Rapga

Tsruru gitspalakleni wa rapga, jiwuta
 wane tupchekya kanawamuna
 ga wa yopo, nikchine ga wa
 kamejirune koxa gwa potutlu;
 shimane koxa gigleretlu,
 tsrungkakaklu tjigloklu rapga
 jiwutpotuko kajiruji tnikinripa. Rapga
 jiwuta rukshikika koprure pasreta
 gapga gapokikolupa, Mano koprure
 pixka ga wa Sotlujga koprure,
 waneko pixka rixa Poroso koprure.



Rapogle

Ginaklupje rapogatanutka rapga ga wa tsuru koxa. Gepi pixkalutu rapogle wane, satni wa polga gapogleru, supru tsunga chigkaluru, pochkeruko gapogata, walenwa yine kanawatni chowgetachri. Ga wa satni gina rixini, wale gapogkaklu wa tsru rapgakaka, kachichangata rixkaklu.



Rapogatinitka tsuru gi rumkata koprugkota, gi koxa rumkata shimagatkota, kyowikpotlu. Seyni galikaka magalewantinitka rumkata shimagatkotatka, kashichayapatkalona: gachijri, kapiropa, klataknao, pimrokaka girixanu gishaga tushpakyatka shimane.


Raserowna

Kayichininitka tkachi raserownatka kayimnutkani, girumkata gishpakletanna mturunni. Raserownagognetini, kagimtatka gogi ruglajitna yine, pagixanu giknoganu wale gogne. Kshana koxa gaserowna, wa gonu rawinina ruprigamtinripatka. Raserowna koxa ksuru wale gaserownini gimpatkani chigka.



Rashiche

Rashiche chigkalurni wa gijiwu gitokote gwachri, giyaljiwu, mchirjiwu, mrixjiwu gashiche. Ga wa nikalurni nikchine gashiche, watjirunni gijretle mturune, maklujine ginikpotunatanruna rashiche, girixanu giyampotu rutlikjiwutsgapkatanunna. Klatajpa popninuta rixa wa rashiche.



Rawrata

Rawratini ginapni chinna ga wa psoluko rugnantakna yine, girixanu tsru-ginapni rapogatanu, tsruru ga wa rapga. Walapuklu rawratini tutakanu supru chigka, yine wane china rutlojrutlo. Rawratini gi wa rumkata gishpakletanna maleka, ruylatanna xako. Girixanu gixo yinni giylatachrini yowu.



Ringi

Ringi gishpakyachrini goshgajeru gewiko gimkata kamruretyalu. Shichichi rushpakya ringi, kirungi koxa wane, ga wa shima, gamjirungi. Psoluko kigleyalni, yochliru ga wa giwlalu koxa kiglepotuylu. Kajine kamrure koxa wane: ringi-stono, shijiji, machkirgonruji ga wa wapguji, pimrikaka potiriyaksu gitakalurutka.

Rukamlaka

Yine gimatyalu pokamlalu tkachi yochigleya rumatika. Yokanakamtinitka pokamlalu rakaxrikletamtatka: rumrerekamtinitka goyecho, runnewatini wane pnute rukamlakamtatka gogi, mapshaglu gowukshini rikonangantatka rukamlakatka.





Rukonre

Rukonreni pasreta jemikaluru, gipjita ginaple yanumatkoclunu. Rukoneta gewpotuko gwachri pixka yanumatyachri pixka rixa jemkota. Rukonre satu ginjekaklu pixka gixachrini. Njemlu wa Kajpomyolutu katpaliru ruylatini pasreta rugitya rukonre. Wa rukonre satu ginjekaklu pixka gixachrini.

Ruma

Kacholni ruma wutakle. Kawshimunalni. Wanero gixo pixkaluto, tsro sagi ga wa mturo ga wa kajine gitakle koxa wane. Ruma mtsersagito walanwa pinrechi kigleyalni, kapogalu, pachwalu, tseru, chinjiwuwlu. Nikalurkoxni shimagayma wa wyapjetinro wanepnutkoxa girkalurni. Galukalurpotni ruma: yine, panene ga wa kajine galukanropotni.






Rutlogle


Rutlonjetini gi wa kagogne rixkaklewata, kyowikolni gipapkokta rutlonjetini, giyagni gi wa rushpakna, gosha yinrina. Wane chinna, kwamunugitlogle rixini yinerni gipnana waleko rumatyatkana yine.




Rutslolokle

Gonu gijrukgyawakni teno giyakatyachri, rujrukale, magkachpale gingatyachrini gonu. Mishawaskitga rawa satu gitslolokle, Wawogappa waneru, Pokani jiwuta koxa rawa ga wa Charawga ginaple koxa rawa satu.







Santira

Walapuklu gitakalurni wa santira ksatu rutaklona, kakwalu, chiklayoyma gipxaletachroni. Gixo sagirni katslayongasagitaa tixa. Pejnuruneko gannatanroni: kochijruji, gipetu koxa niklo. Tumkata gishagkakota santirane. Wunrone gimretpotutlo totataji rutakypatnaklona tujra walapu.

Sana

Wixa yinwu kgisanatewaklerunwu. Giyagni muchinanu rushwumpukotna, wane pnute kayika tsru gagmuna, rustakaplutka, yoxika, koshgatskerotluna ga wa rutakluna.

Sana kamrutikolu pejnuruneko jejine, suxone, mturune yapretlu, wane wutaklu galukalurpotu, jimeka ga wa paranta. Wixa yinwu wumatlu satpacha patsrujirmole pnute gitaklu.






Saweto

Pnumnu yapachroni saweto, talutalune gipxaletachroni. Shiji sana tetini tnikanru. Wane pnute kiru koxa tannapotuta. Gagmunapaya giprigachri tutakanajita, gepi wgenepjero. Tpuratkoklunu gipaktenanuktalo: shen shen shen, china. Ga wa tutnogognenata, polpajirni gonshipitaa tixa klatgojirni ga wa ksajiygipataa tixa.

Saxripi

Kona sure koxa kamrutika saxripi. Waneru satu saxripi, tsapi kamrutikaluru, kamgakaluru gagajeymako. Wane gima rixapna muchikawa, wa jiro pejri katajijero gima tsaxrigimatlu wa twiyawaka giyagni powraputgognenanro.



Sensewlo

Suputako yapachroni sensewlo, jpirogerni, kyojrikaklerni, tyosatjetini wa panchi wane chigka, katupnikta yayixanuna. Gepi pixkalune wane, ksajiro ga wa popniro. Sensewlo ksajiro walanwa kyojrikaklerpotu, wane tixa.

Gosha tjemini jema: suuu suuu, china; sensewlo gigitu: seee seee. Tyayegitakalu tujgakopletyaplu, gi rixanu muchikawgima kogetkoga jema yineru rixnawa, gepineko rawyegkakgimtapna muchikawa. Ga wa sato popniro, walani gaxawripa gwenene nikachro, malepjiru panchi talukpotuta.



Slopa

Gitskeroko gwachroni slopa, wataksupna shalewatachroni. Gonu spuwnaga gwachroni, kashegiro wenu tuglereta gwaleta. Totomiji, kasapra tnika. Gi wa tapalushata slopa, gixolurni. Rumrerekamtinitka wa slopane tshikalewamtatka, gogipatkani, wane rixna.



Soklo

Suputa gwachroni soklone, pagognemnunanuka tetka. Kapluru twajeta, kshikalerni soklo; koshichine tskala twajeta. Tsetsene, tsomine, kasaprane nikna. Gixolotni soklo. Tutakimpatka, chiji tjitota, gitokopna tutaka gixo najjro, tkapotini ga wa tuspakini, tushyapnamtatka tetapnatikolupa. Serojrirni soklo.

Soloji

Mturpotni soloji popni slototaa tixa, poprolopkomutaa, ksalaklerpotni. Goshamxigi gwachroni, chiji yapachroni nikchine tskala tyapa. Tsrurnini, gogi gimatachroni goyechnokawa tshikalewata, tumananu, goyecho, gogistsi, waleko rumatyana gi papkotkani.






Sroschi

Psolchijneko galukikalurni sroschi. Walayma psoluko rukshikika magatinrina yine. Wala chinanu yineru kamrurewgognenata rumkata gikshikletyaplona serojiprojna. Muchikawni nashchi koxa kigleylo, maklojine ruxrewatinitkana, wala najetatkana sroschiprojiyma. Gepi pixkaloto wane toproji ga wa tosure, wanero pamole proji kshansure pixka tixa, pamyo moleproji sergogolni, satpacha sure polgogolni, gepi pacha sersurpotu.

Sunu

Gimtasha gajerni sunu walanwa tsro gagmuna. Wanero gepi pixkaluto wane: serolo, ga wa klatalo. Tupxalonni wa mapowmuna, seygni gi wa tapkaplo tsernuya.

Wutsrukatenni gimatkale, satu yineru gipnini tmanewgimata, ganikajyecho gima tushpaka, wale chinanu kamalejksu gimyonotna ga wa gepi sreta ksujeko, ma mapnutyapna mturune.



Supru

Gikmigi gajerni wala, kasureru nikachroni. Waneru kolyapiri tganuru, gi wa tsrupotni wale. Wanekoxlo tuparo, poler-supru, wala galikaka tsropotu. Gemeruklu gagmunakna gitskero tolkajetya klojroleta tixa. Walapuklu ksatu tutaknajita supru, mapa mole naji tutaka, kataksureru rixini tutaka. Wutsrukatenni gimatkale, tuparnaji nikinna kwugenerone wukalewawgenetanna.



Suwa

Gosha gajerni wale, gichkolpotni. Ga wa mgenoklu giylatachrini. Retinitkalu mgenoklu ralpokotatka ginshiko yokwityanatkalu, ga wa suskakanatkalu wane rixa suwa. Gikaygiru gojriplu gi tsrunamni. Nikanroni: managi, kanagi, katsotalo, kamla, pokgi satumnu nanuko. Wale sewata girjetachri mturu gichkopiralni.







sh




Shawashka

Yopri molni wa shawashka. Gosha gwachrini, seyni shawashka chigka, girixanu yopripixkapotuko rixa, seyni mturuyakni wale; ga wa jimeji, ginshi pwalpotlu. Gagmuna gapalushalu rutika shalewata, pimrine ma kojwakawgenetyanuplu, ga wa sanu rajirota. Nijitni tsetse, kasapra. Panchistsi gwachrini ga wa sana. Kapayopje ruglereta nikleta ga wa paranta serolo. Shawashka-nwa tsru kgixpiranalni satumnu koshichi yimakachrini. Gixpotu plaji rumata ga wa kgimatkalerune, gitakyagokinitkalu, wanna wane china patsrujiremole pnute plaji rumata yimaka.

Shepchigeru

Gosha gwachrini, giktarixini kapluru manewatya shepchitskigi wane pnute sanatskero, ga wa gosha koxa rawa, tsetsene nikachrini. Muchikawa wane chinna wa shepchigeru, wujiwu wutakinri shepchi nika.





Sheyna

Gi wa gosha gajerni sheyna, gongaspuwnaga gwachrini. Katomijiro nikachrini ga wa chlichije nikjetkoxa. Kigler koshichni, ksajru gimeji ga wa klatastalu serjiwutaa rixa, gixolurni sheynane, gike rupxaletna. Kigleshegijiwutaa rixa, wale chinanu sheyna chinruna. Suxone shikaletlu wane chinna: sheyna shlegajiji, sheyna shlegajiji.



Shichichi

Gosha gwachrini shichichi, speriji ga wa machkiru rupxaleta. Sajiwatinitka totumta, kanalu niklu, yine koxa gannapotutlu. Shichichi pkayikinipa rutsolguwatanna, pukayikanune waneklu pametajitinipatkalu rupgopotuta. Ga wa gepi pixkalutu wane: sergituru ga wa klatgituru.

Shikene

Gagmunapna ga wa chiretupna wane rawa shikene, kajiruji nika, ga wa koshichine wgenene nikachrini wa shikene.

Waneru poleru ga wa pwalolu shikene.

Watjirurni gimatkale wane china:

gi wa pyimashikaletanru shikene

pyimlewatininapa, pmanagitewanu.

Shikene gojripataa rixa, klatastata ga wa ksajgiturni. Nikalurkoxni wale. Raluka giretini gina repuka shikalwata: chogkwen kwen kwen, china shikaleta.



Shimagapi


Shimagapi galukalurpotni, kiru kamrutikalurni katsluksuyma. Jejine shimagatinrini kapiripapje, sotlu gemrotachro gigkikalurni. Ginrikloku waneklo galikaka satumnu shima rugkika: kapiripa, myamutu, momo, patlu, kolyo, gojrintalo, gagamta klonernikokta jimetinina. Wale pejnunanuko rugkika shimagapi. Rali shimagletinitka gipji chichipawa sreta yosatalkalu marumtutewniripa. Walepje nikapyanina wutsrukatenni.





Shimageru

Tsruru spuwnaga gwachrini wa shimageru yokluplu teno gwachrini. Pakcha pixkalutni gepipje yaniya wa shimageru. Nijitni wa shimane, kapiropa, kopajine ga wa rugkakokluni ginakakta rapokini, gi wa koshcheko seyni waneko yoxikika. Mapgogne gima wane rupchekyatka wa kamaleji gapkakmenu, wale gima sagatka yineru kgapkaklerutkani.



Shino

Kayatu-gonruni wa shino, gosha gwachrini tsru kayatu pixka rixa. Tsruygi kakpotni wa shino, pochwaksuru nikachrini, jimeka koxa nika. Shino gapnutlu wa mturu suxo kamshiro fixinitka, goshlapaygitaa rixa gishpakletana wa mturni.



Shinti

Wumatyalu tsetsegonru rixinri, shinti, yine pikanruni girixanu kgisanerune gitaka kayigletyawakni: shi, shi, shi, shi china panchi-tsi rapokini, wale rumatika kgisaneru, wane gapokanu shinti. Niklu gowatuklo, kasureru, popni pajitaa rixa.

Shishri



Tsomi manewatyachroni wa shishri chigkaluro, wanepnutkoxa wanero tonaji gipweretyachro wa shishri, posurugerni. Shishri pixkaluto wane: shishri-kgijpoliklero, shishri-trechigero, shishri-wuygalegero, shishri-serologero, wanero koya gannatachro kawshistegajetaa tixa wane tsepotlo wa chki. Gixpotu kapcholu gimusrutachroni shishri taluka giylatkoklunu gowukako tetapyanyi giyampotu talnamta.


Shweylu


Koshichi goshgajerni gixlu wa shweylu, pnumnu gixachrini. Waneru gogshishegiru mkojenanni wa shweylu kigle pajitaa rixa. Wane koxlu shweylu peynokate, shweylu popniru, shweylu katajiru. Giyagni wane chigka, shweylu shale gamtatnutanro ge giskoglo mtserotnumenni ga wa gojripitaa rixa, kagwurgapje girgatachrini. Yine getachrini, kagonchi koxa reta.



Shyo

Galnachroni wa shyo, kamejro seyini pantalotni tomeji gi wa nikchine kamejirune pixka tixamejita. Pnumnu gixachroni shyo, popnirone ga wa sergogomtalone koxa wane. Gixo satpacha pamyo mole pnute wane, goyecho yotunotachroni. Waneru kagwuru gashigatachrone, gejnujigerone ga wa kopajigero. Wanero satoko shyo granchi giwekyachro walanwa kashkalero kyowikolo, kopupu chigkaluro, yayixlu geneklewatachro. Kgitaklewaklerone shyone, girixanu tuchkapopeji rupchekya gosha. Wa shyograga saga kotatiniwa jeji mashaptolu rupcheka shaptota.








Taki

Taki-nwa satu koshichi gixoluru ksatuko gwachri, wane rutaknajita. Kanaji rixini gipamatsnunanru. Yinerni rumkata yotsnaktseptagleta. Shimapje nikachrini. Ga wa walapuklupje retpotutka. Ga wa ginapuklu gi wa retka, ginakaktaya.



Taklala

Walanwa sato kochijruji pixkaluto wa taklala. Klataklopinshirni. Seyni wa tosatuko tushpakawgenetya. Tnikanruni koshichi wgene, gaxawripa wgenene koxa tannapotuta. Goyechnopje yaglotatachroni, tujganikletyawaka. Nalapla, kokopla, jinripla gwachroni. Yine gayegixanroni. Gi wa nikchini taklala.



Talutalu

Talutalni sato saweto mole. Gipjitako gwachroni wane tutaka wgeneta, ga wa katslushako gimkiyachroni. Tnijitni wa shiji, gachichogwu, ga wa gatliri-pjita. Yine gayegixanroni wa shiji tnicketinri chinanu wa sana gajeru. Talutalu-nwa gixoluro, pakatapje tapokini sana giyampotuko tnikatanru shiji sanni.


Tampora

Walanwa sato gagmuna swaga kamrutikaluro, yineru kamrutanro, wa tampora. Mriximta, pejrimta, kshoterumta ga wa charawanta tsapwakatsigitka, gepno kaka sretako, tumkata pgime gixletinripa. Muchikawni yine kigimawluklu gansatikalurni.



Taya

Taya-nwa gonu gajero. Sato shimni magaputo ga wa tsrochkeero. Yine gannapotutlo komlugaya. Tnijitni kapansure, koychicha, serolopu. Wanga spuwnagako gwachroni. Walapuklu ga wa tsrugkakaklu rawa.



Tlagwa

Tlagwa-nwa gonu spuwnagako gwachroni, ga wa kanipreklukoxa twajeta. Walapuklu tuglereta shikalewlepotuta, wane china: tla tla tla. Waleko rumatikatka walapumnutkani. Gishagatkomga tutaknajita waneko tupwretya. Tnikanruni: tsetse, kasapra ga wa gagyo. Gi wa tapalushata, gixolurni. Yine nikanroni tlagwa. Pinrechkojni, getgolewatachri pinreni.



Tochkegi

Tochkegi walanwa parantapu giwlatkaluro yojixkaluropa gigaya, yine nikanropotni. Gepkoxamkoje pixkaloto tochkegi tkamrutika: wanero serolochkegi, tsotsotachkegi, jimaprochkegi, walanwa knoytatachkegi chigkaluro; ga wa gajiplochkegi walanwa muchikawni yine kpashirochkegi chinapanrona, girixanu yayixachripje nikanroni, gixrewatachropje suxo nikanropni, tmakatataje tixinripa.

Toljru

Gosha gwachroni tolojru, seyini kapna gimkiyachroni. Tnikanruni: tsetse, kasapra ga wa gagyoy. Walanwa pnumnuyapashatachro, tujganikletyawaka. Gosha shaga, gitkomga wane tukaknajita. Ga wa waneko tupweretya. Ginapuklupje tshikalwata: pwaapwaapwa, china. Gimnu koxa nikanroni tolojru, tsaplewjetinina waleko rumatyatkana, gimnukta kashichanro, chinna yine.





Tomotomo

Tomotomo-nwa gipowga spuwnagako gwachroni. Kopajipje gawgajro shima nikachroni. Tushimagatanunni, pachi, gakapla, tlutlu, gogru, wannanwa tupxaleta. Yine nikanroni, ga wa topixkoxa ralukyalona, wa kigimawatachro gitakanropa.

Totumta

Totumta gosha gajerni wale. Seromta plajitaa rixa. Nikanruni: shichichiji, speriji, kasaprane ga wa klunerukokta kajiruji nikwale, niklojitlu gitoko plaji rutaklu, ga wa pnunnu rapjemtyawaka, raplimtyatkalu, wane rupchekyatka, shichichi ga wa speru. Giyagni wa totumta kgitaklewaklerni. Ralipre walapu rutaknajita, gepkoxamkoje najlu. Wa totumta gitu walenwa yine galukanrupotu.



Tretre



Tretre-nwa watahako gwachri taklala pixkalutni. Nijitni wataklo ga wa katsluklo. Goyechnopje giyokachrini rujga nikletyawaka. Yaglotyechnotini shikalwajeta: tree tree tree, china. Tretre-nwa satupjerutu yanyachri. Muchikawa gima yinerni nikachrini tretre kagnokotlewгиматини rupgujewna yegilewata, ruylatanru ga wa nikanru; wale chinanu yine gikayegiklu tretre.




Tuwumta

Tuwumta-nwa pnunnu gixachro tuwutikolu. Gepi pixkaluto waneywu tuwumta: shima tuwutikolu ga wa kagituru tuwutikolu. Tuwumta galuklu popri tixinripa tkachi gemnu wa giprikakano. Walapuklunwa kigleru wa tuwuntatikolu. Waneklu koxa shimane paligata. Giyagni wa Gakosto ksuru, mturune gapnanutinri jiglokleyna, wtuwumtajeta, wnikanropa ga wa wushagkanropa. Wane wixa giwekleta wixa yinwu.







TS




Tsakjeru

Gagmunampuko, gishaaga, gijpa, rapga gwachrinwa tsakjeru; gipowga koxa rawa. Kopaji nikjeta ga wa kasapra. Goknamanetaa rixa. Shiji gitakoklunu ga wa kakwalu rapnugimatlu, gi gima kajpotlu pajkakgimlu ga wa kakwalu koxa. Kluplalajgitaa rixa, yine gannapotutanruni. Gigkaklu wane chinna, waneru tsakjerupi wa gimnu.

Tsapa

Suxone kamruni wa tsapa, wapgu kamrutikalurni kayonmapataa gixachrini, yine giyakontanrine gonra. Jeji gitnutanruni, pagixanumnunanuka gitakalurni: kartochoji, kiruka, kamaleji ga wa pimrikaka. Yoko rugkinwa jeji wane yoshmaklo. Gishagkakalurni, kajine ga wa krigkone gigleretanruni, xani gognenani yine kamrutlu kigletaa tsapa kayonalo.





Tsapi

Gosha gwachrini tsapi, gimtasha ga wa magka koxa. Gixo pixkalutu wane: jematsapne, mixritsapne, wipiyatsapne. Panchi gostutkalurni tsapi ga wa satumnunanuka gostutkalurni. Kojita kamrutiklurni, saxripi, tseygogi, gigeru, yoshkikagapi, sagyetpu, pimrikaka xani gognenanu. Kapiragkoxlu wale, yakokna ga wa managi gipchekyachrini wa tsapi.

Tseklu

Kamejirni tseklu, gi wa teno tyapa galnaleta, chiji yapachroni. Ponikgiturni tseklu. Magkachpale gwachroni ga wa ksalaklerpotni wala, tyimaksatkoklunupje tugkaka. Tsropotni wala yoko pnute katslamrurutaa tixa. Wane chinna yine Kajpomyolutupra gimni. Tomsapotunatkoklunu giyampotuko rugitwa Kajpomyolutu, saa saa, chinamta.



Tsetse

kasureru nikachrinwa tsetse pastomxigi ga wa jenaklo rawjeta, gitaklu surkoxa nikjetachrini. Yine purawatini koshichiwgenene puratinna rujgapotutluna wa tsetse, roglupratyapna. Wane pnute mturune koxa kachalupi giglereta gigkajetyalu tsetse.



Tspata

Sato gagmuna pgaymunalni kshimuna pixkamka fixmunata, wa tspata. Gi wa tensheglo ga wa gotlapsuretaa tixa, poprolsaglo tonanwaka twajita tseyojitaa tixa. Wanero sato goshgajero, polesaglo wala, yogyi chigka. Wa tspata kajnuwaklerni wa tosagi gitokote twajeneta waneko tmanewatya. Mturune gannatanroni, ga wa pinrekoxni: gapliri, tseru ga wa kachlikleru jiglokanru. Wanero tspata pnumnu gixachro: sergituro, klatgituro ga wa goshgajero, tspatagonro, sato yaygi chigkaluro, walanwa ponikolpotu.





Tsojri

Gijpa gwachroni tsojri poktepatataa tixa, tuprigyegitini tkopruta tsrutkomgawakatya. Ganikajwalapni wa tkoprutiniri wa tsojri wane tixa giwekleta. Yine gannapotutlo gi rixanu ponikpotlo tuwlatkoklunu. Wane chinna wa yine sunujnu pgutgima tmanewatya wa tsojri.



Tsolya

Tsolya, walanwa gitaklechi niikaluro ga wa tkoywuka koxa. Yine gannapotutlo, pochwa tixini ga wa nikchi koxa tyapjetka. Gixo pixkaluto waneylo wa tsolya: poktepatalo ga wa popchipatalo, wane pnute pnunnu tixa, poprololo goksupalo saktoknojitachro ga wa totspatkaka.



Tsomipi

Kanajirni wa tsumipi kapcho waka gwachrini, wane koxlu metkotu. Wunanwaka rawjeta wugraga chinanu ruweka. Gikiglerni wa tsumipi kamakalni ruxolewna potunatini, cho cho, china. Pnumnu gixachri wane: tsrupi, mtserupitu, tseyolutu, kalyasropalu, gimchatapi. Wixa yinwu wumata girixpoko giylatkota wa tsumipi, jipalokshiya.

Tsunruji

Tsunruji, wanero gixo pixkaluto, klatmejiro tsrokakalo malashagajero, wanero tseyluto, psholiji chigkaluro. Ga wa popniro wane pnute pwaltseptagiyo. Yine galukpuratlepotutlo. Walapuklu yine gijgalo puratyaplona tsunruji tutakawgeneta. Paranta gajiplo tnika mturo tixini.




Tsuwu

Satu shima molni tsuwu, katatlu ga wa ksajiprujita rixa, pokte ptsegataa rixatjita tsruygalerni. Rapga rawa, gipowga ga wa tsuru. Kowchogatini yineru tomsatlu shimshitwa yineru: chwi chwi, china: tsuwu tsuwu. Giyagimni kyowikolni, girixanu tsakini yineru kamakalni wa gigapu. Wgenewatini gikota rutaka wgeneta, wane girukotyana.



Tsyii

Sato koshichni tsyii panchitwashaleta, wane tutakanajita, tupwere wgenetinitka yine puratanatakalo. Paranta serolo nikachroni, satumnu tnika. Tshikalwatini: tsyii tsyii, china. Gepi pixkaloto tsyii wane: popniro ga wa polero.






W

Wajeya



Tsominwa wajeya, totgimne wapgumko pixka tixa, kasureru tnika ga wa kasurerukotwa. Gixo wajeya wane: klatamkogiro, seromkogiro, pwalomkogiro, ksajimxigiro pnunnu gixachroni katagimkolni, tujtukoklunu tuwrilewata kachinro, managi pixka tixa chinota. Tserownitka wajeya tumappamtatka ga wa tmejiwamtatka tkatatotatka, waka tkasaprata. Gimka sato kamshiro giylatinro kamkogi jiwutspotuplo twugene.



Wakawa


Kashaptolni wakawa, wanena pnunnu gixachine, walako pixka gixachine. Tsro nikalni wakawa, shima ga wa kajiruji tnika. Gikmigi gwachroni wala, tsro shimni, tumwana katsalo ga wa klataknao. Togema woglutinna gaxawripane, giyampotu tseruwnana. Wutsrukatenni gimatkale sato makloji galixinitka wala tnikini giyampotu tuxowna.



Walo

Gimtasha gajerni wa walo ga wa sana suputale taluka gwapotleta, jimeksure nikachroni ga wa gitaklu gimtukachroni, giyagni wali gayegixletlo.

Waneylo walo suxo tsrunnini shikaletlo: walo, walo suxo, tumetinitka twalotatka, china shikaleta. Nikalurkoxni walo gojepirni ga wa gepiygipjero tasmusmu nikleta.




Wamu

Tsru shimni wa wamu, malasha gipowga gwachrini, shimane nikachrini satomnunanuka. Ga wa pshinitsoykaka gimlitachrini wanga kamrutkometa wane ruknokgatya wa jeji ga wa suxo yoptotlu, wane rixa wgenewleta, rushpakinitkana jejni wa girukotachri. Galukalurpotni wa wamu girixa ginnu chinanu, wale kigleylu kamgopi shikolu.

Wasluji

Gosha gayerni wasluji ga wa yine koxa gitaklo. Ginapuklu tsajiwastetatka, puserine, chkotune, kletune ga wa pimrikaka nikchine koxa niklo. Yine koxa gannapotutlo wasluji, goshgajero gi tsrojkakni, seyni yine gitakle gipso-pshogajinanro.

Tnikoklunu gixpotunanu kachinonnutaa tixkaklewata, wuspu koxa jra tixa, kshiyajitaa tixkoxa.



Wapgu



Gepi pixkalutu wane wapgu, klatamkolu ga wa plomko. Yine gitakleni, wapgu ga wa suxone jiwetanruni satumnunanuko kamrutyaluna: koshma, mkachrinama, tsapmapa, gitjipitsa, gitnuprepi ga wa shechi. Tali sachpaletinitkalu wa suxotka yonatkatka tlipi ga wa ksajijpaluyma; wane pnute ranokatkaluna, rupriginika yotsgakatka, rerkakatka wane gixachri gitakatka, pimritka gishagkakatka. Wapgu tsoji kigleylu tseruglu, wane pnute gigralewatachro kotskikagragata.



Wapra

Satopjerotni wapra, goyechnopje gishpakachroni, kataksureru rixini ga wa gogi tumka kaptajiru tshikalewatya, tshikalewatini mturune tumyeka. Kamejirune tskala gwachroni, kasaprane ga wa tsetsene nikachroni. Wutsrukatenni genekamtyawu wapra shikalewatini panchistsi, yinekta salwatanu wchina.

Wata

Kloptogitaa tixa gipchekleta wata, wanero tsro watasha kyowikolni towshi, tustaklewatini tyayixkaklewata. Watasha ruglereta gwaleta tretre, toklo rannapotuta goyecho wane shikalewatya; tre tre tre, china. Mapa pixkalotni wane: mawshito, kawshiro ga wa tseyokuro. Psoluko kigleylo wata kashri, tuwlatikolu, yayixlu, wane pnute kena.

Muchikawni gima tsrunnini watawgerni tsru nikalni rapnutinnatkaluna rupniyawakgima rupchekya satu kshana. Wale gima giwakotna wata, waleko tumatikatka.





Wawlo

Gosha gwachroni wawlo, gipsosaginanro, goshako gwachroni, rapokini gipapko kasaglo kaynuto pixka tixa, mayoto, gapijruji, tseruji pixkamka tixa, seyini wawlo tsrosanpotni, kakshitaa tixa tnikoklunu. Goshgajene nikchine koxa gannapotutlo.

Giyagni muchikawni tsrunnini wala gima ratskotna, wane gima ranurni kosputakyegitya ranxale chinanu, wane gima shishrine kamgiyanru yowinitana.

Waylama

Gosha gajerni wa waylama ga wa kiglepotlo, chkotu wgenejni, klomkogijro klomchatajro. Tnikanruni kasaprane, tsetsene, kajirujine gosha gwachri. Pakatkaka yine getlo, makakta galuka puratlepotutlo ga wa shikaletlona.







Wgero

Mtserotpotni wgero, wumta gitokote yomokachroni koplu-giyagoklo, klataa tixa. Kapcho rixini wsapowle wane twatka, goyecho tkamrumrurewata, tkojwaklewpotuta wumta tjiglokini. Kagitaa tixa katre mane tixlewata. Tashkotlewata kagichinotaa tixa. Gasogri toloji, popo, ruma ga wa kapsasureru tpinreta.

Wrolo



Shisri pixka tixa wrolo, seyini pnumnutixajita serojiro, kayonajiro, popnijiro ksajjiro. Kagwurga tnika, waleko tkamrutyalu wa pochwajpalu, twugenene chinanu ga wa wannanuko. Seyni gi walapjeni, wanero: kamotolo, kayonalo, yowini. Gagmuna twa wa wrolo wane tkamrusagitya. Wutsrukatenni gimatkale wala koyagle kigleylu wa kapogalu. Giglu giglostalu, tameta gragatlo suxo, wala turuni klatashlegataa rixa mturu.





Xirikapi

Xirikapi gimatikolni gigeru ga wa gepnopi, tyenwa shireta giwlaletikolu. Tyekaka kamrutika kamejirunshi, giyekanshi, totumtanshi, kanalunshi wane pnute koxa konaklo tsapi, tsoleklo koxa kamrutika xirikapi.



Xirna


Muchinangapka chichi gistaka, wane pnute yoshikpawatka. Wane xirni yatka, katmerotaa rixatka. Xir-nachri wumatyalu rakpagamtinri chichmero myoxigikamtkatu, waneko pixka rixa yineru xirni jige kanuwpotuta xirna gragata. Satumnu jimika wa chijmero.






Xripi

Kapayalu gwachroni xripi, satumnu nikachroni jipaloji, kajirujine ga wa shiji koxa tnika. Talutalu pixkalotni. Xripi rutaka kayigluta pna muchikawa kagonchine. Giyangimla muchikawa satu kagonchi yokanatlo xripi rajmero chichi twapinripa maylu yegiya. Wale chinanu xani maylune posuru nikjejgognenatanatka, giyagimni ksajjiritaa tixana.







Yatalu

Ksatu pagi gwachroni yatalu, gitaklugerni kakwalu, santira, ga wa chiklayo gastajiklarni. Kowchogatkalurkoxni wa kaplalo, kolyo, gojrimtalo kosetikalurni yatalu. Mturune yatalu jitlimyotini, giyampotu rumata ganongapkatna.

Yawo

Tenoshegi-twa yawo, mteyakatni gi kmatslo. Pnumnu fixa yawo wanero: popniro, ksajiro, kyotmolero, kayonalo. Yoklutsoji tnika wala.

Suxo kamshiro yopukgatinro tapnuwgenetlo tusatutanru rushpakininatka yawoko pixka rixana wa mturni.






Yawuro

Yawuro tsru kamejirni, tenolpotni, tsumanni, tsrujiwni, tsujrini, klatmejirni. Gixolurni wa yawuro, ksajnejirni wa rupxaleta, ga wa sero plajitaa rixa. Gipowga gajerni, sunuplu wugenewatya. Ga wa mgaluklutsuru wnaga yatka, wane shima nikyatka. Gigapu tumleji kamrutika, giyagni wutsrukatenni kapokonni yawurogapu tumlejtapyana, wale gima ransatapyana.

Ylopo

Gimtasha gwachroni ylopo, gixo gagmuna pnumnunanuko gixachri tskala tupchekya wa ylopo. Knoya gannapotutlo ylopoji ga wa yine koxa niklo. Sawli, gepchi gistakinipyi ylopomtaga pamgalutanu, topata pjimanu ga wa topagi pinitanru pustakikowaka, waneklu giyanpotuko yonnutini, topatakoxni tserpinre, Pnumnu gixachri yayixlu tnipinita.



Yoko

Yoko gaxawripa pixka tixa, kajiruji, gomawlu ga wa chiji yapachroni wala gerujitachroxni ga wa tegkoxa talna, kigle shawaka gwachroni tumajewatinitka shikalwatatka; yoslolo yoslolo chinatka. Gaxawripa psolo seyni poprolosta sagitaa tixa, gixnajirni koplejimtalni, yine gannatanroni polgata tixgata tuwlatkokluni.



Yonalu

Mishito pixkalutni seyni yonalu kayongataa rixa, gosha gagerni wale. Kamowa, makokawa, gaxawripa nikachrini gikta rixini. Gogi goyecho no yaglotata rujganikletyawaka. Gi wa gixowgenru, gepipgena. Mapa pixkalutu yonalu wane: yonalpotu, mtserkakane; waneru ksoliru, walenwa tsrupotu; wane giyagoklu kshiyogleru, gi wa tsrupotni. Rutkokluni riyiylishaptota. Yoptotkokluni matsuwata, rumata nujitita ma shishri gijpolityaplu nujiti.



Yonipro

Malepjiwaka manewatyachroni, kochopa pixkalotni potsojri-potlo tyomoklewatini, ga wa kochi jixi, kewe jixi ga wa yineru jixi tyomokjeta wane tserowniya. Klochetetaa fixa klonajistugataa wa yonipro.



Yonwaloji

Rapga gajerni yonwaloji shikotalni. Tnijitni kasureru gijpagkalu, sotlu koxa temrota ga wa jema gichkagerni yonwaloji. Gixo najirni, sotlu gogote tutaknajita. Rapalushatinna suxone yonwalojinjetna, nikanropna. Gogru gannapotutanroni, giyeka ga wa mrixine.

Wane pnute pinrechi koxni yonwaloji, solgogi kigleyalni, kamshirogkoxa nikanroni ma machino tixyapa.



Yopixri

Gosha gwachrini yopixri, gagmuna gipxapxatachrini. Seroknapalni, yotukanshishegita rasukini. Gepiygipjeru shikojiru nikachrini. Nalaji, konaji, kochikloji, kantsuji, chiretuji, komloji yopnatachrini. Wanena gixo yopixrine pnunnu gixachine, serolune ga wa klatalune komloplu gwachine, wane pnute popnirune, wannani kapopnane.

Yopo

Galukalurpotni gimtasha ga wa magka tuglereta gwaleta yopo. Nikawnastsitka walapu tupgopatatka, kannipgalu gapokamtinitka wale gowuka ganikatkalo toji, giyagni tupalapcheta. Walapuklu tupolsureta gipnachri pixka tixapluta. Wane pnute tesureta. Tomta galukalirni yine yoshmopchogitlo ga wa panene koxa galukanroni. Wanero sermunalo yopo ga wa klatalo. Sana koxa tutaka.




Yopri

Kanipreklü gwachrini yopri, wane rumkiyna talutaneyma ga wa klatastaluneyma. Nijitni kapayo ga wa paranta serolo. Gixo pixkalutu yopri wane: pinga, paksho, tspatspa ga wa shawashka. Tsrü gagmuna rutaka shaleta walenwa: yoklu, jipinaji, kiru, gachichmuna ga wa pimri gagmugkaka. Papokolutu rawa shaletna, rajirni sanu. Shalewatini suxopjenwa kamrurewata ga wa jeji shikalwagognenata: chkololo chkololo, chingognenata ganunrogirukotyawaka.








Yotlotlu

Rapgapjitapna gwachrini yotlotlu, kachonale pixkalutni serpixinshinikanru, mumatkane kachonale chinru. Seyni pnuko rixa gitsru-potni wa yotlotlu gitsrujiwni klumchatjiwlu, gepi wgenepjerutni ga wa gonnipgalni rujmikini, rujganikletini rannatanropotni shima gachijiri gerni. Gepimyoko nikyachrini.



NATGAMTA

Muchinanu wtokanu yonga



SE TERMINÓ DE IMPRIMIR EN LOS TALLERES GRÁFICOS DE

TAREA ASOCIACIÓN GRÁFICA EDUCATIVA

PASAJE MARÍA AUXILIADORA 156 - BREÑA

Correo e.: tareagrafica@tareagrafica.com

Página web: www.tareagrafica.com

TELÉF. 332-3229 FAX: 424-1582

ABRIL 2011 LIMA - PERÚ



Con el apoyo financiero del Gobierno de Canadá, a través de la Agencia Canadiense para el Desarrollo Internacional (ACDI)



Agence canadienne de développement international

Canadian International Development Agency



unicef 
únete por la niñez



Bolivia - Ecuador - Perú
eibamaz
Educación Intercultural Bilingüe
UNICEF - Finlandia



INSTITUTO SUPERIOR PEDAGÓGICO PÚBLICO

BILINGÜE DE YARINACOCHA

